

Dil ditto, di primo. Dil licentiar la fameia dil colega, qual vien de qui; à satisfato li salarij di mexi 10, rimasto do soli con le robe, et Andrea di Franceschi, secretario, qual verà; perhò manda 7 cavali e un mulla, sarano consignati al podestà di Trevixo. *Etiam* à fato, per alleviar la spexa al re, perchè za motizavano. Et è da saper, ditto re fa le spexe a li oratori nostri, che niun altro fa questo.

Et leto le letere predite, sier Nicolò Trivixam, procurator, savio dil conseio, qual era in setimana, referite *succincte* quello disse eri el cardinal in colegio, seusandosi si nòn havia referito il tutto. Et con effeto non referite di tre anni, *videlicet* per tanto tempo il papa voleva.

Et fo posto, per tutti d'acordo, la risposta al prefato cardinal, zoè che si ringraziava la cura dil pontifice, e il fervor di soa reverendissima signoria in le cosse christiane; et qui si usò molte parole. Poi, quanto a la richiesta di l'orator, era stà creato con soa signoria sier Zacharia Contarini, el cavalier, qual anderà con amplo mandato; di li ducati 40 milia a l'anno, vol dar il pontifice a quelli serenissimi re per anni 3, nui li volemo dar ducati 80 milia, e perchè *alias* il papa ne scrisse 100 milia, si cussi da mo pareva a soa beatitudine, si sforzeremo *etc.* *Item*, di non far trieve ni paxe col turcho eramo contenti, *etiam* dil tempo; sperando il christianissimo re di Franza, come per li capitoli di la liga fece con esso re di Hongaria, promesse dar subsidio di la decima general. Dil romper, saria bon quelli reali rompesse nel stado dil turcho, et, venendo turchi con exercito a le parte de Italia, se li opponesse, e per mar la Signoria nostra con l'armada, et con quella dil papa prometer di far *etc.* *Etiam* sarà quella di Franza, et quella di catholici reali di Spagna, qual è *in ipso actu.* *Item*, credemo el cardinal curzense va legato in Alemagna, *etiam* farà optimo fruto. Et, concludendo, la Signoria nostra de intrepido animo è per far contra questo turcho *etc.*; et si alcuna volta par *etc.*, è perchè vedemo esser soli a questo. *Item*, quanto a le galie 20, ringratiamo soa beatitudine, et za ne è preparate; perhò soa signoria avisi la beatitudine pontificia di questo, che ne sarà molto a caro. Et andata la dita risposta, have 6 di no, el resto di la parte.

Item, fo posto per sier Lunardo Grimani, savio a terra ferma, sia taiata certa parte posta eri, suspendeva li X savij non facesse la tansa a quelli di le gastaldie *etc.* Et per non vi esser il colegio, sia anulata, con questo, la execution sia suspesa, fin per pregadi sia terminà. Et li consieri, a l'incontro,

messenno darli el conseio doman; et cussi volse *etiam* il Grimani. Andò le parte: 42 di consieri, 66 dil Grimani. E fo presa.

Item, fo posto per nui ai ordeni, di tuor a stipendio nostro maistro Zuan di Arzentina, bombardier, con ducati 12 al mexe, et ducati 3 per uno fameio, et sia mandato a Napoli di Romania. Ave 24 di no, il resto de sì.

137 *Scurtinio di ambador in Hongaria, in luogo di sier Nicolò Michiel, à refudado.*

Sier Francesco Querini, fo retor e provedador a Cataro, <i>quondam</i> sier Andrea	47. 95
Sier Polo Pixani, el cavalier, fo avogador di comun	49. 83
Sier Alvise da Molin, savio dil conseio, <i>quondam</i> sier Nicolò	58. 80
Sier Zorzi Emo, fo savio a terra ferma, <i>quondam</i> sier Zuan, el cavalier.	67. 75
+ Sier Zacharia Contarini, el cavalier, è di pregadi	78.73 81. 58
Sier Piero Balbi, fo savio dil conseio, <i>quondam</i> sier Alvise	60. 81
Sier Lorenzo di Prioli, fo avogador di comun, <i>quondam</i> sier Piero, procurator	32.108
Sier Domenego Trivixam, el cavalier, fo provedador a Cremona	74. 64
Sier Zorzi Pixani, dotor, cavalier, fo podestà a Chioza	72. 81
Sier Bernardo Bembo, dotor, cavalier, el governador	58. 92
Sier Zuan Batista Bonzi, fu synico e provedador per le camere	15.129
Sier Marco Zorzi, fo savio a terra ferma, <i>quondam</i> sier Bertuzi	46.106
Non. Sier Hironimo Zorzi, el cavalier, podestà a Verona.	

Noto, in questa matina, in quarantia civil e criminal, da poi molti consegij, havendo sier Nicolò Dolfim, fo synico *intra culfum*, intromesso sier Alvise Loredam, fo governador a Monopoli, et datoli . . . capitoli, et parlò prima questi zorni esso synico, li rispose sier Alvixe predito, et giustificò ben e saviamente. Or ozi, posto la parte di procieder, ave 4 di procieder, 19 di no, et 40 non sinzier. Et fo el primo conseio a domam. Et la matina sequente